

STJÓRNARTÍÐINDI B 115 – 2000

24. október 2000

2179

Nr. 776

AUGLÝSING

um breytingu á deiliskipulagi athafnasvæðis við Meltún, Mosfellsbæ.

Bæjarstjórn Mosfellsbæjar samþykkti minniháttar breytingu á deiliskipulagi athafnasvæðis við Meltún, Mosfellsbæ, á fundi sínum þann 11. október 2000.

Breytingin felst í því að byggingarreitur við Völuteig 6 er stækkaður. Hámarkshæð viðbyggingar er 6,5 m.

Greinargerð og uppdráttur hafa hlotið þá meðferð sem skipulags- og byggingarlög nr. 73/1997 mæla fyrir um. Skipulagsstofnun hefur heimilað auglýsingu deiliskipulagsins. Deiliskipulagið öðlast þegar gildi og við gildistöku þess fellur úr gildi eldra deiliskipulag frá 10. maí 2000.

Mosfellsbæ, 24. október 2000.

F.h. bæjarstjórnar Mosfellsbæjar,

Tryggvi Jónsson bæjarverkfræðingur.

20. október 2000

Nr. 777

SAMÞYKKT

um kattahald í Blönduósbæ.

1. gr.

Kattahald í Blönduósbæ sætir þeim takmörkunum sem greinir í samþykkt þessari.

2. gr.

Allir heimiliskettir í Blönduósbæ skulu skráðir á skrifstofu Blönduósbæjar gegn greiðslu skráningargjalds og þar fá eigendur heimiliskatta afhenta númeraða plötu með skráningar-númeri kattarins, sem alltaf skal vera í ól um háls dýrsins.

Árlega skal kattareigandi framvísa vottorði dýralæknis, um að kötturinn hafi verið hreinsaður af spóluormum. Þá skal, ef óskað er eftir, framvísa vottorði dýralæknis um að kötturinn hafi verið hreinsaður af öðrum snýkjudýrum sem máli skipta.

3. gr.

Eigandi kattar skal gæta þess að köttur hans valdi ekki tjóni, hættu, óþrifum eða raski ró manna. Kattareiganda ber að greiða allt það tjón sem köttur hans veldur, svo og allan kostnað við að fjarlægja dýrið gerist þess þörf.

4. gr.

Gjald samkvæmt 2. mgr. 2. gr. skal greitt samkvæmt gjaldskrá sem Blönduósbær setur að fenginni umsögn heilbrigðisnefndar. Gjöld mega aldrei vera hærri en sem nemur rökstuddum kostnaði við veitta þjónustu eða framkvæmd eftirlits með einstökum þáttum. Blönduósbær skal láta birta gjaldskrána í B-deild Stjórnartíðinda.

5. gr.

Bæjarstjórn Blönduóss er heimilt að láta lóga ómerktum köttum, enda hafi framkvæmdin verið auglýst með áberandi hætti í sveitarfélaginu og kettirnir geymdir í a.m.k. 7 sólarhringa áður en þeim er lógað.

6. gr.

Með brot út af samþykkt þessari skal fara að hætti laga um meðferð opinberra mála og að öðru leyti í samræmi við ákvæði laga nr. 7/1998, um hollustuhætti og mengunarvarnir, með síðari breytingum.

7. gr.

Framangreind samþykkt bæjarstjórnar Blönduóss staðfestist hér með samkvæmt ákvæðum 25. gr. laga nr. 7/1998, um hollustuhætti og mengunarvarnir, með síðari breytingum til þess að öðlast gildi þegar við birtingu.

Umhverfissráðuneytinu, 20. október 2000.

F. h. r.

Ingimar Sigurðsson.

Sigurbjörg Sæmundsdóttir.

AUGLÝSING

um breytingu á aðalskipulagi Ísafjarðar 1989-2009, Tungudalur og Seljalandsdalur.

Samkvæmt 19. gr. skipulags- og byggingarlaga nr. 73/1997 hefur ráðherra þann 24. október 2000 staðfest breytingu á aðalskipulagi Ísafjarðar 1989-2009 frá 31. október 1990. Staðfestingin er gerð með fyrirvara um gerð bráðabirgðahættumats, skv. lögum nr. 49/1997, við gerð deiliskipulags og afgreiðslu einstakra byggingar- og framkvæmdaleyfisumsókna.

Um er að ræða breytingu á landnotkun í Tungudal og Seljalandsdal sem felur í sér að skíða- og útivistarsvæði er stækkað og afmarkað, nýr vegur er lagður frá Skíðaheimum að nýju þjónustusvæði á Seljalandsdal, lyftusvæði eru afmörkuð og nýir vegslóðar/fjallvegir eru lagðir um svæðið.

Uppdrátturinn hefur hlotið þá meðferð sem skipulags- og byggingarlög mæla fyrir um og samþykki bæjarstjórnar Ísafjarðar. Skipulagsstofnun hefur afgreitt erindið til staðfestingar.

Umhverfissráðuneytinu, 24. október 2000.

F. h. r.

Magnús Jóhannesson.

Sigríður Auður Arnardóttir.